

荃察余齋詩文存

荃
答
余
齋

詩
存
增
祥
題

重校

自序

余以戊申之年始試京秩俄由內翰改授粗官判馬曹而參軍惜鳳池之奪我謝眺晚值不在中書劉巴共語惟有兵子簿書期會學殖荒落其不知者直以爲項籍足記名姓蕭公可作騎兵卽相識者亦但稱李悝能造法經蒯徹號爲辯士蓋未有以能文相許者余亦不敢以文自見也迨虞賓告檀霸府初開客薦揚雄之文名在桓公之幕陪應徐於鄴水公讌聯吟接沈范於梁臺分曹掌記於是然犀渚畔時聞袁宏詠史之聲戲馬臺前漸傳宣遠送歸之作所作古今體詩頗爲名宿推許

駢偶之文又得王君書衡弁言簡首是又娥碑絕妙題辭待於中郎左賦無名作序屬之皇甫者矣羣公見推余亦自壯哀集少作附益新製薤夷蕪蕨簸揚粃糠凡存詩三百餘首文十餘首錄出副墨校付寫官豈曰藏山聊供覆瓿毋亦繡其輦悅賢於博奕者乎顧余於茲竊猶有說劉孝標之自序杜元凱之平生敬告友朋藉攄感喟余也楹書寥落葛帔單寒無黃散之人門有青氈之舊物不得不習爲干祿之字溺於應舉之文旣而射策科停鑱廳制廢乃復東三傳於高閣讀百國之寶書五百童男徐福東渡三千經藏元奘西遊今雖承乏

議郎不親吏事宜可以規樞荀宋吐納風騷然而中年
絲竹哀樂傷人故國滄桑谷陵易處化君子爲猿鶴起
陸地之龍虵感事撫時傷離厭亂則又已懺除綺語歸
命空王結社廬山長隨慧遠散華丈室示現維摩李孝
貞云五十之年倏焉而過宦意文情一時盡矣嗟乎千
秋萬世誰定吾文九流百家天之將喪眡經籍爲糟粕
比燔阮而有餘棄彝倫若土苴校洪猛其彌厲文武道
盡乾坤或息然則呂覽之書懸於咸陽國門長慶之集
寄於香山禪寺又何爲哉是可悲已己未伏日忍堪居
士鄧鎔

頁

二
一
印書局印

荃察余齋詩存起癸巳訖壬寅

成都鄧 鎔守瑕

雜詩

墀英墮牆溷廁鼠穴太倉縱之恣貪饕誰與惜芬芳憑
藉執相縣甯能齊得喪外戚法所侯任子皆爲郎勿字
不盈百安用策賢良珥貂侍宣室鳴騶朝未央甯生短
布衣曼夜晡清商

美姝年始笄窈窕雙鬢髻流媚照珠采綴響閔蘭氣箕
帚奉君子婉婉承其意絺服躬澣濯紈扇恐捐棄啾啾
春禽鳴蕭蕭涼風至歸甯固所懷不敢告師氏

大盜不操弧國法誅竊鉤侯門存仁義匹夫叢怨郵天地至不
仁萬物皆狗芻高位蔑孔顏赫執凌賁諸大力隨所負充德甯
有符圭筆啗糠覈督儒何溝猶策足要路津靳予甯區區
作賦憑子虛著書陳說難秦皇與漢武讀之累咨歎恨
不與同時折節相交歡韓非初見秦讒賊生憂患馬卿
因狗監給札弄柔翰非卒陷大戮馬亦無顯官相賞且
如此不知抑何怨長喟懷古昔令人摧心肝

贈王文子石

琵琶彈到鬱輪袍破石驚天意氣豪大醉滿斟桑落酒
壯遊雄帶赫連刀紅鑪輒炆京華夢黑水重洋大海濤

只有蓬山無路去，罡風吹折鳳皇毛。

散盡黃金一敝裘，歸來寂寂茂陵秋。空尊潦倒陳驚座，

長笛淒迷趙倚樓。甯復罪言論澤潞，惟應舊稿續瀛洲。

子石遊歷南洋
著有海客日譚豈知筆札兼唇舌，名動當年王子侯。

雨夜

半捲湘簾半掩門，熏籠斜倚黯銷魂。雨珠添迸珊瑚淚，

一匹龍綃萬點痕。

李晉王

老去英雄喚奈何，三垂岡下百年歌。甯生兒子如劉表，
會長蠻夷似趙佗。漠北至今沙磧在，河東從古戰場多。

錦囊死去遺三矢猶挽雕弓射汴河

送岳三丈堯僊會試禮部兼呈曾竺齋夫子

東風昨夜來河冰凍不開風檣疾於馬直上燕昭臺雪
裏寒梅爲君折猩紅點玉霏瓊屑他鄉遙憶故園春相
思好向梅華說君最相思我最愁錦江花市昔同遊碧
雞坊畔新詩藁白兔樓邊舊酒籌少年意氣人中傑百
萬梟盧拚一擲斑駁夜宿吳孃家艷鮓醉踏紅樓月將
家子弟健譚兵負羽曾隨驃騎營上座從來重揖客還
家依舊是書生歸來獨對青山臥閉門不省高軒過匣
中雄劍作龍鳴百練純鋼經折挫豈道行雲出岫遲擇

林偏占最高枝就徵已詣公車令賭勝誰圍別墅棋側
聞今上虛前席臨軒御製賢良策召對明光早上書扈
從甘泉應珥筆家中朝久著聞麒麟閣上漢將軍應
劉此去超清秩霍衛他時續舊勳一言囑別君須記京
華早有人顛顛撲馬緇塵染素衣年來沒滅懷中刺當
時供奉錦袍仙千尺桃花上別船雲雨荒臺三峽夢鷓
鴒春水五湖天江樓帳飲猶前事一騎紅塵遠書至爲
說維摩減帶圍誰向揚雄問奇字宦味鄉情莫更論憑
君傳語候寒溫馮唐不久羈郎署魏勃無勞掃相門今
我奇窮如涸鮒鑽研故紙成書蠹一顧甯邀白眼窺十

年深悔青袍誤送人作郡爲人忙路鬼揶揄笑我狂昔
見陸機會赴洛今看枚叔更遊梁悠悠江水東流去明
朝挂席知何處水驛春潮落枕寒輪船海瘴連天曙一
路郵籤辭故關臨邛駟馬待君還天津橋上西南望落
月停雲石鏡山

謝安石

自向廣陵移鎮後東山別墅草離離死留召伯千年埭
生破苻堅一局棋絲竹中年有哀樂江山半壁繫安危
生存華屋歸零落策馬西州總淚垂

宮怨

昨夜輕霜拂玉鉤
曉鐘聲斷景陽樓
自家薄命悲團扇
不怨君王敢怨秋

郊祀甘泉扈從難
長門擣素怯衣單
金籠妬殺紅鸚鵡
頻向昭儀訴早寒

王蜀別苑故址

翠華遊讌此曾經
一段琉璃徹夜聽
血漬土花猶化碧
春來宮草不迴青
流星有路迷飛輦
涼月無光照後庭
大似梁臺歌管靜
東風如語夜搖鈴

紫蓋黃旂走汴都
八哥空此拓雄圖
春秋十國猶兒局
割據三川免子符
銅狄沈埋遺甃在
玉樓荒廢故釘無

不堪再讀烟花集喬木蒼然叫鷓鴣

虞美人詞

天陰月暈雲羅愁水咽烏江平不流敵騎如潮撼山岳
萬金購募生王頭細腰此夜踟躕舞曉幙棲烏催蠟炬
淚洗胭脂一斛珠芳襟亂落櫻桃雨流連寶帳爲君歌
絳羅帕頭刀在韉已見沐猴失冠帶誰言逐鹿分山河
八千子弟江東水何人肯殉重瞳死紅粉成灰沒馬蹄
姓名不著葫蘆史君不見韓憑胡蝶青陵臺杜鵑望帝
空歸來香魂縷縷不銷盡二月東風罌粟開

贈顧子遠光祿

山林臺閣兩平分江上閒鷗嶺上雲大隱而今在朝市
布衣從古揖將軍耆卿詞按紅牙板子敬書題白練裙
一片冰清誰得似北山何用勒移文

八十年來兩鬢華朱顏長似醉流霞瑯環福地茂先宅
安樂行窩康節家一榻禪枯朝證果半鑪香燼晚澆花
靈光且喜巋然在餘論應無惜齒牙

煬帝

不信圖儂大有人春江花月又南巡盒中尙結同心在
鏡裏愁看好頸頻螢火飛來迷苑路燕泥落盡剩梁塵
只今惟有官隄柳曾照宮帆汴水春

珠館

珠館朝真控紫鸞五雲深鎖碧城寒琉璃性脆風能破
齒蒼香銷露未乾望斷玉璫天外信夢回金帳故時驩
海枯石爛談何易手拊離絃未忍彈

繡被同舟忘昔遊東西溝水欲分流元來河鼓難償聘
未必姮娥肯耐秋此去枉留青玉案重來望斷綠瓊軒
絲絲長恨能消盡除是黔烏白了頭

紀事

六鼇吸浪動蓬萊聞道天書近已裁獵火夜燒徐福海
樓船春下越王臺明知上策攻心勝誰請長纓係頸來

獨有元和天子聖摩崖須仗勒銘才

玉鉤斜

蕪城城內楊花舞蕪城城外伯勞語東風吹盡野棠開
猶見隋家一片土片土荒荒揜翠鈿燕梁泥落葬嬋娟
羅薦瑤席杳無夢玉匣珠襦私自憐生前玉貌夫容蕊
守宮點臂石華紫金鑾鎧燼擁瓊人羊車望斷千門裏
汴河流水錦帆驕二十四橋吹玉簫君王好頸何人斫
皂筴香殘烟未消宮裝掩面啼鉛粉相思血碧土花冷
寂寂紅甑鑱墓門殘螢不度胭支井莫向銅臺感繡帷
雷塘何似望陵時二分只有揚州月曾照迷樓曉畫眉

警報

警報新傳海外增長鯨跋浪勢飛騰單于臺下朝馳檄
堯母門前夜買鐙下瀨戈船空上將臨淮壁壘想中興
秀才便擬從軍去笑看吳鉤病未能

惆悵曲

惆悵復惆悵井上轆轤轉兩地結同心相思不相見蓬
閩峯高弱水深西來青鳥信沈沈燒殘綠蠟餘清淚拗
斷紅蓮寄苦心一桁簾垂春不挂封香遞與越羅帕劇
憐吳質是長愁恰好雲英猶未嫁豆蔻春梢怯曉寒瓊
蕤裊裊雪中看只教明月窺芳砌肯放東風入玉欄烏

雲三尺縮朝髻文履雙鉤裙百褶團扇遮羞卻更前華
鐙照影明還滅住向增城十二樓天風吹盡彩雲收涔
陽極浦迷靈媛夢渚微波託蹇修只愁天上紅牆隔文
鱗不渡滄溟闊瓊島三生有夢歸瑤華千里無人折散
作流塵化作烟紅蘅碧杜惜芳年嬋娟分不逢山鬼幽
怨空期操水仙十年同在長干住斑駁猶認門前樹日
薦花片有開時風斷藕絲無續處未卜他生誤此生靈
犀一點鎮通明翻將懊惱年年怨吹入參差夜夜聲

明妃辭

一曲琵琶大漠昏李陵臺上謝君恩行行已慣胡沙遠

不望生還入玉門

關山月

紅旗閃閃翻皂鴉穹廬蓋野圍平沙冷露如珠溼戰鼓
牙門列戟皚霜華健兒意氣驕不得卷蘆吹管淚沾臆
櫪馬無聲擁甲聽萬里長城一片月小小從軍老未還
幾人曾唱大刀環祁連埋盡征人骨漢使猶聞遮玉關

秋柳和漁洋韻

淡烟疏雨儘銷魂暮靄沈沈獨掩門堠館聞砧寒有信
旗亭賭酒夢無痕神鴉社鼓前朝寺斷雁明河昨夜邨
太息徐娘今老去舊時風致不堪論

蒹葭極浦動新霜秋思分明入練塘
羌笛玉關橫吹曲舞衣金縷嫁時箱
春江花月憐隋帝梁苑賓朋感孝王
開徧海棠春二月記曾走馬碧鷄坊

一領經秋白袷衣青春度盡昔遊非
江關詞賦才人老玉座丰神絕世稀
六代山河勞北顧五更烏鵲向南飛
荒寒寫入蕪城筆說著封侯願總違

蕭蕭瑟瑟迴堪憐隴上飛雲江上烟
空復長條能踈地縱餘薄絮不成綿
香蘭正則嗟遲暮枯樹蘭成惜歲年
我與東皇重訂約春來移種向雲邊

七夕留別

蒼龍白虎森寒芒月冷璇宮秋夜長
點滴露珠不成淚
星河明滅天蒼蒼傳道天孫嫁河鼓
一年一會匆匆去
伯勞燕子東西飛天上人間同此苦
揭來一十二萬年
匏瓜無匹空中懸
楂仙有恨留機石
天帝無聊索聘錢
銀潢終古自清淺
水咽銅蚪聞漏板
但覺清宵細細長
豈知幽會猶嫌短
鵲橋橫漢無多時
寶婺沈光牛斗移
析木津邊望夫石
明朝又是長相思

燕歌行

武皇御宇初用兵
材官騎擊俱從征
護羌校尉燉煌郡
橫海將軍樂浪城
五陵游俠良家子
少年意氣輕生死

白刃殺人杯酒間黑丸斫吏都城裏上書召對承明廬
願逐嫖姚東擊胡不惜鵜膏淬寶劍但開螻臂控雕弧
前軍已出長城界鳴笳疊鼓臨渝外黃榆片片軒轅臺
紅柳毳毳光祿塞東明魚鼈駕成橋迎接天兵夜度遼
候騎凌河盤俊鷗打牲鐵嶺獻豐貂豈知一戰全軍北
九帥連營氣如墨填壕時見鬼燐青壓壘遙看壞雲黑
兵氣從茲更不揚聲聲殘角背頹陽大黃弓勁霜初凍
太白旂高月正涼庭議紛紛罷征戰天子焦勞極宵旰
誰遣終童係頸來但從婁敬和親便健兒聞此雙淚流
解衣揖別龍額侯黃金斗印不可得歸來縱獵南山頭

金陵

虎踞龍蟠勢未休，酒旗高捲秣陵秋。
黑頭作客羞江令，青骨成神拜蔣侯。
王氣甯銷建業水，鐘聲猶在景陽樓。
山僧都解南朝事，爲說曇花一現收。

手奠高皇酒一尊，鄱陽湖水至今渾。
一朝家法娥嬀配，十廟功臣信越魂。
走却鰻魚歸大海，飛來燕子啄皇孫。
孝陵守冢春耕處，黯黯金鐙照墓門。

看奕人知此局輸黃旗一角，擁留都自言頭頸誰當斫。
却是心肝早已無瓜，步兵來朝飲馬，梧宮宴盡夜棲烏。
南唐枉念家山破，抵得春鐙燕子圖。

第地蚩尤夜有棱吳山立馬氣飛騰憑誰神筆搗全策
才見官儀識中興畫戟銀槍軍府令輕烟淡粉妓樓鐙
金甌莫道仍無缺天塹元來未可憑

秋雨曲

梧桐葉落飄井榦金壺銀箭更初殘西風吹雨破窗紙
長簾涼深秋被寒攃攃械惱秋睡的礫鮫珠鴛瓦碎
應是嫦娥不耐秋瑤宮滴下相思淚相思相望隔天河
寒衣未寄裁吳羅朝朝暮暮別離苦歲歲年年幽怨多
別離幽怨驚秋早隴頭流水蕭關道一點空階萬點愁
人未成眠天未曉

戲贈王雨生

結子成陰又幾年尋春重見杜樊川
接來桃葉人如故照罷菱花夢已圓
應拍紅牙進君酒爲言碧玉想夫憐
鳳皇臺上吹簫曲一闋新詞寫蜀箋

劍門關懷古

嘉陵江水空中涵巨刃摩天揩翠嵐
款段疲驢上不得神工鬼斧青巉巖
迴旋閣道連雲棧兩界中分天一綫
獵獵陰風吹戍旂時清久已無征戰
英雄割據今何在幾姓降王同一概
小漫天外大漫天入洛單車走青蓋
君不見望帝與蠶叢褒斜益塞當秦封
中原龍鬪幾千

載荷戟閉關無與通開門揖盜何人始蜀王鑿路迎妃
子石牛誰信糞黃金五丁力士開山死從此隴蜀爲一
家錯儀定計收邛巴自挾藩籬守堂奧石棧天梯囚井
蛙咽喉僅此一坏土牛鐸郎當馬鈴語不識悠悠行路
心至今猶歎崎嶇苦杜陵問天空復情我言疊障何須
平如鉛清淚向雲灑迸作淋鈴秋雨聲

感事

大星墮地殷麟麟若木垂花斫作薪畢竟長城誰壞汝
甘令臥榻睡他人樓船楊僕歸何日海島田橫死亦神
我是麻姑雙鬢綠又栽黃竹看揚塵

頡利原無香火情
銅槃血熱便寒盟
人傳甌脫千邊警
我恐暉臺九鼎輕
開國江山餘王氣
外蕃鑠鑰控陪京
秋高華嶽陳搏睡
驢背無人說太平

萬馬窺邊殺氣屯
伊涼蘆管吹黃昏
枉勞都護通西域
孰爲黔夫祭北門
捷報甘泉無日到
罪言澤潞向誰論
千奴一膽虛相共
宵旰焦勞苦至尊

破碎金甌作戰場
中興將帥半彫亡
棘門灞上如兒戲
犀甲吳戈有國殤
鼓角橫吹關月墮
招搖斜指隴雲荒
生平無甚傷心事
却爲山河泣數行

題浣花夫人廟

浣花溪下紅蓮短浣花溪上綠莎淺沙隄十里路緣江
雲旗高卓靈風滿供養香花舊有祠綺疏雕檻覆華楣
齋廚粥淡分鹽豉塵座落深卷畫衣朝真夜度疏星晚
集社春飄夢雨遲烟煤點浣桃花馬無復褰裘逐隊時
當時窈窕年三五青鸞信杳銀河阻輕薄東君嫁杏花
綠陰暗換天涯雨小隊元戎貯阿嬌明珠十斛買歌舞
子夜新聲桃葉歌夢中梵字霓裳譜二月春風細馬馱
銀槍畫戟嚴城鼓如海侯門春不知瓊花一笑千金賭
輕盈綠屨戲秋千玲瓏紅豆調嬰武一夜蚩尤旂竟天
夫容開盡城無主侍婢弓刀粉陣寒天花亂落夫人乳

誰信軍中氣不揚
爭將麾蓋比高涼
錦車坐見先持節
羅袖時聞舊染香
翠羽明璫豔青史
金書玉策照紅妝
連蜷靈子虛壇靜
五音繅會殺蒸冷
北渚雲沈眇眇愁
空原一片神雅影
萬里橋西尙有家
至今女伴浣溪紗
芊芊沒字碑前草
緩緩催歸陌上花
試看校書門巷在
秋墳寂寞冷枇杷

歲暮感懷

羅雀門前客漸疏
倚樓看鏡意何如
生來慧業須成佛
人不窮愁肯著書
未必在山爲遠志
方當作賦擬閑居
百年泡影曇花裏
禁得匆匆幾歲除

一世曹騰我獨醒
蘭肴惟擬薦湘靈
江湖咫尺枯魚肆
牝牡迷離相馬經
問舍求田雙屐折
讀騷飲酒一鐙青
談兵亦止供消遣
何必書生應將星

回思結客少年場
百尺高樓上下牀
君不讀書無足語
奴猶故態本來狂
焉知天上荀鳴鶴
且請監廚趙稚長
賣賦千金揮霍盡
歸來寂寂茂陵旁

我輩當爲第一流
何妨皮裏有陽秋
秋孫登長嘯如鸞鳳
莊子憑呼作馬牛
驢樣人材皆令僕
狗徒攀附亦王侯
擲揄路鬼休相笑
冠帶由來是沐猴

管輅聲名動一鬢
孫陽未遇肯長鳴
休言畫餅如名士

但覺常談厭老生不值一錢甯到此得烹九鼎死猶榮
華陽耆舊如相問爲說孩兒已倒繡

夜坐有懷王仰思

經旬闊別不相聞馬糞諸王最憶君氣鬱青霞愁叔夜
陰成綠葉杜司勳臨池枯樹凝寒路案戶明河接斷雲
夜話冷齋應未得只餘燈火照離羣

乙曲

乙曲銀鉤掩繡幃苦無消息寄當歸高樓西北勞相望
孔雀東南各自飛紫陌紅塵春遠近青天碧海夢依稀
玉匙漫啓葳蕤鎖愁見餘香染篋衣

記得青禽報好音曾將梳子結同心與添半臂探寒暖
學畫長眉問淺深偕隱冀能如德曜定情何止似繁欽
思量舊事成惆悵枉把垂條惜故林

錦字相思若爲傳蠟書暗寄阿誰憐無情衣帶分寬窄
中道齊紈有棄捐照鏡早知疑是夢吹簫已恨不能仙
分明幽怨無人訴撥盡湘靈五十絃

少照團圞多照離嫦娥暗裏笑人癡分無好事猶懸望
已誤華年苦不知采鳳孤飛甯有翼春蠶未老便無絲
青羅斗帳紅蕤枕那復橫陳似舊時

贈吳幼陵

避世無如錦瑟旁
薔薇浣手坐燒香
南州冠冕推龐統
東觀蓬萊老竇章
高士買鄰千萬貫
佳人臨帖十三行
銜來腐鼠休相嚇
知爾鷓鴣已早翔

贈高虞卿

皮裏陽秋莫漫藏
黃陂千頃自汪汪
讀書且喜能思誤
使酒於今未敢狂
青骨異時神蔣帝
黃金無術作王陽
君家玩婦真成癖
便擬溫柔老是鄉

寄王丈子石黎莼齋觀察幕

去年台灣割行省
浙閩防海無安枕
今年重慶開埠頭
倭船直溯江上游
千奴共膽徒支柱
井底蛙囚不敢怒

東封三峽一九泥書生猶自談洋務干鎔自躍金不祥
江山已錯鐵難鑄一幅孤帆七尺身未歸早是倦遊人
甯將兩袖黃金淚老却百年紅玉春子雲筆札君卿舌
曾是五侯舊賓客僻書未悔讀南華靈樞早擬通西域
男兒溺死何拘遊布衣祭酒當封侯焉知渾沌鑿七竅
鐵路縱橫五大洲只今不用平夷策王門如海裾難曳
牛角中宵叩短衣魚羹上舍彈長鋏此去何人不憶家
故人曾岳半天涯客途歲暮愁芳草故國春餘怨落花
萬言書在君休上極目中原日易斜

戰國諸將

大梁宮闕化灰烟每過夷門輒悵然願以昏因附高誼
甯知韜晦謝兵權屠沽兒輩皆奇士酒色餘生保暮年
尙有荒祠人奉祀繁臺何處柳如絲信陵君

受代無如騎劫何金臺回首獨悲歌終令駿骨歸他國
幸免鴟夷咽怒波汶竹滿邱臣力盡謗書盈篋將門多
蒯通主父俱流涕異代蕭條氣不磨樂毅

兵書讀盡十三篇孫武家兒有祕傳坐見千金賭田忌
終令萬弩報龐涓名如豎子談何易謀及刑餘主亦賢
今日驅車過戰地馬陵夾道起寒烟孫臏

險道行軍號令明穴中兩鼠鬥縱橫傳家尙有楹書在

震地如聞屋瓦鳴安得小兒能破賊從無名將易言兵
翩翩濁世佳公子不負平原相士名

趙蒼

震主威名一世雄杜郵賜劍太匆匆諸孤飲恨何時壯
秦法無恩不善終降卒盡阮天惡殺權臣最忌將成功
屬鏤扶眼東門挂八月胥濤此憾同

白起

郢門北望悔蹉跎善飯無如老去何殘夢中原漳水逝
鄉音異地楚咻多臣門似水賓朋散國勢如棋將相和
一掬壽春城下淚那堪灑向趙山河

廉頗

歸老頻陽謝病遲果然鄢郢沒全師始知兵法多爲善
難得君心信不疑三世兒孫傳將種六王封建掃殘棋

將軍大樹飄零盡愁見王離被虜時 王翦

北地良家舊有名朔風胡騎嘯邊聲
椎牛夜宴從軍樂 牧馬秋高出塞行
市吏黃金多入幕宮鄰赤舌自燒城
金輿玉乘房陵去豈獨邯鄲歲受兵 李牧

游白馬寺作示伍伯谷

門前十日無車轍凍雀噪欄天欲雪
君來邀我看梅花 布袍木屐衝寒出
相攜同出大安門 槿籬茅屋江上邨
已見野狐穴高冢還餘涸鮒依沙墩
江路一灣復一曲 纔到山門面城角
斷塔埋蒿拾墜鈴 高杉蔭晦巢雛鶴
中間琳宇高層層 四垂瓔珞耀金繩
方池自湛功德水

古盞長明般若燈主僧破衲拙迎送齋廚淪茗呈清供
香臺清磬寂無聲石壇梵幢迴不動薄遊便過王公祠

王名懋

泰明嘉靖中以大禮議謫四川高縣典史明史附見某傳中

陰風颯颯吹靈旗墓

碑僅可記名姓國史由來參信疑遺骸瘞此一坏土翁
仲無言暗淒楚雲旂風馬靈之遊丹荔黃蕉天所許灝
氣英光迴不羣百年富貴如浮雲君不見魚膏照徹三
泉涸牛羊牧上蜀王墳

寺後有大家俗呼蜀王墳方志無考蓋明藩也

摩訶池晚眺

御水流春漲廢池無人更奏聖琉璃草生凝碧春猶在
藕泣香紅夢已遲杜宇千年非故國烟花一卷譜新詞

至今古木宣華苑衣服雲霞鬼唱詩

聞王丈子石歸自重慶感賦

誤盡平生是說難壯遊歸去溺儒冠由來吳札皆皮相
徒令韓嬰避舌端入境未佳休啜蔗當門必刈莫滋蘭
難除湖海元龍氣猶把純鉤醉後看

寄王聖旂新繁兼柬幼陵

書劍脩然何所之繁江孤棹泛晴漪彈琴學鍛愁康懶
臨水登山宋玉悲傳道靈修在湘浦思君清吹發參差
少城西畔明明月照見圍鑪促坐時

滿眼新知易故驩所思遙在碧雲端裁書正擬緘文鯉

寫韻先教寄彩鸞

幼陵以香祖夫人所臨陽冰謙卦見惠

各帖雙鈎金管

細小樓一曲玉笙寒人間豔福君消盡占却東風十二欄

久別相逢行贈張紫垣

我昔與君初見時君方壯健我兒嬉各自一去無消息
已是十年長別離買鄰當日與君近雞犬無猜巢燕定
一院分澆紅藥春兩家平占綠楊蔭是時海御方宴然
堯母宮中壽萬千觀酺詔進龜茲舞買鐙勅放水衡錢
雖云殷富不如昔畢竟前日勝今日園政失綱物價翔
蹉場改運民財竭弘羊方欲算車船桓寬甯敢論鹽鐵

世局如碁且變更我輩飄零何足惜一日逢君話舊因
須眉猶認故時人向平粗喜畢婚嫁原憲猶然甘賤貧
人生匆促百齡短壯遊未惜天涯遠青史成塵醉後看
黃金如海愁中遣萬里江湖七尺身橫森坐見飛蓬轉

詠史

員嶠方壺記十洲荒唐臣朔夢前遊單于自是天驕子
瀛海環包大地球七竅何人開渾沌五兵終古怨蚩尤
孤嫠只恐宗周隕恤緯年來抱殷憂

皇帝稱兒事不經燕雲割棄誤調停債臺無處藏王赧
胡服何曾變武靈突厥東西天可汗

宋岳飛送紫巖張
先生北伐詩旗臬

克汗頭汗
讀仄聲

長江南北小朝廷
紇干山上休回首
凍雀歌

來未忍聽

茗玉鐫名總不如唾將禍水記當初
異人擁立成奇貨
冒頓和親遺謾書
沙麓已崩逢漢厄
林光未火襲秦餘
種瓜莫唱黃臺曲
抱蔓歸來累欵歔

胡粉搔頭好自看
文嬉武宴中興難
猶然上品無寒士
但得多錢是好官
彭寵功名遼豕白
項王富貴楚猴冠
縱傳鬼谷飛鉗術
可奈秦王未易干

獨眺中原平乘樓
陸沉誰與問神州
十軍阿父中常侍
四姓良家外戚侯
降表有書修李昊
尙方無劍請朱游

諸公袞袞尸居氣孰辨邱山貉一丘

廣漠開疆百戰勳遼金遺事舊曾聞妖童藥白驚劉裕
天女輜輶嫁詰汾羣盜敢先銅馬帝濤神猶避水犀軍
於今龍虎消沈盡無復芒碭五色雲

衣帶誰承密詔多三人市虎竟傳訛徒令太學誅鈞黨
枉把清流付濁河北寺刊章橫緹騎東朝遺命負黃羅
那堪怪鳥千羣集頻喚聲聲帝奈何

拂衣蹈海淚沾巾六國連衡欲帝秦傀儡登場兒作戲
擲揄送郡鬼憐人亂離淮海成私史耆舊襄陽問逸民
擬向武陵深處去桃花春水正迷津

玉音樓懷古

獻賊屠秦復擾楚不畏蕭娘與呂姥
桃花馬上畫長眉
紅粉蹁躑作韋虎史傳吳婢帶弓刀
帝詔平陽開幕府
江上八千子弟兵樓頭五百夫人乳
手請長纓氣不磨
沙場萬里大凌河君王恩禮隋
譙國夫壻英雄漢尉陀
錦車奉使朝持節羅帳籌邊夜枕戈
彝陵焦土秦灰黑
焉知閣部無長策帝箸倉皇調土兵
軍機枉向巡台說
保境歸來倒捲旗鴛鴦戰襖血淋漓
瘴烟滿硯餘男妾
冤雪彌天怨督師昔時賜綵天顏喜
宸章獎譽奇男子
龍氣消沈十二陵平臺一夜生荆杞
遊鹿姑蘇事已非

凍雀紇干飛不起每依南斗望思陵燕支淚溼如鉛水
錦袍猶貯嫁時箱夢冷封侯舊戰場玉冊金書墮塵劫
寒烟落日帥忠堂官兵早解防夔萬流寇安能到益梁
始終太息金甌碎棘門灞上如兒戲巾幗功名照汗青
靈旗舒卷風雲氣左帥甯南妄自尊宏光四鎮豈同論
孝陵好見高皇帝只有梅花嶺上魂

桂湖謁楊升庵先生遺像

昆明眼底漢旌旗回首觚棱淚暗垂削草議爭興獻禮
簪花怨寄瞽兒詞放臣屈賈三分鼎新體梁陳七字詩
地下有靈應識我不因叢桂結相知

新都謝忠愍子澄公專祠

昔年赭寇犯天津連率勤王苦逡巡卞壺空拳生殺賊
蔣侯醉骨死爲神黃金枉鑄王侯印碧血誰污輦轂塵
鼙鼓至今思將帥塘沽又已泊兵輪

遊新繁龍藏寺贈雪堂長老

華鬢瓔珞擁層層中有長明一盞燈天竺梵文三藏教
匡廬霧窟六朝僧鏡臺入幻無生法衣鉢傳禪最上乘
慧業文人應屬我來參北秀與南能

舊聞島佛是詩流誤觸長安京兆騶綺語晚年都懺悔
法王猛力護清修前因證果三生石微笑拈花四部洲

今日為師留玉帶山門容許再來遊

五年前見顧長康顧子遠光祿相約來參舌廣長苦恨衆生

無解脫難從臥佛問津梁於今流派窮三教纔信清涼

徧十方打破虛空都粉碎名心一點未曾忘

何肉周妻兩不堪西來密意要同參散華室內聞深法

煨芋鑪邊作夜談入社願隨修淨土成神定可護伽藍

相期流浪江湖後頭白歸來臥一庵

恭忠親王輓歌

宗藩功第一攝政睿親王近代惟恭邸知人屬顯皇珠

槃定歐美赤烏贊同光天怒震雷電金滕冊未亡

楚炬煬秦阿樓船滄海波倉皇狩黑漠哀痛付黃羅軒
劍髯空墮湘筠淚獨多安危注將相卓馬奠山河
十載辭樞密堯門有中興如聞賜几杖時復奉園陵負
辰心難諒漂山煦易增宮樓舊花萼獨上最高層
再聞奉朝請臨樂總悽然變法憂橫議遺言薦衆賢兵
書魏無忌高冢漢祁連回首東平國蒼蒼宰樹烟

詠懷

未風鵲移巢將雨懶徒穴履霜始堅冰邱山積毫髮事
理有固然逆覩究其極夜光投路人邁彼按劍叱衛方
列子嫁梁豈莊周嚇孰云戀鴛棧不肯棄雞肋前卻持

兩端請眈雙玉玦

懷玉被裋褐披裘刈芻薪兀冝寡所諧落落皆衆人鹽
車上太行焉知非麒麟奮臆騰哀嘶思欲凌焱塵凡圉
極鞭策邈哉九方甄

徂火斂餘熱苓苓百卉衰朔鴻厲哀響流螢汎遠輝貧
士苦失職長年固多悲秋風敗叢蘭空谷徒猗猗魯臚
促孔駕楚醴鑿穆機與物無旣斷歧涂滋衰哀躑躅顧
仇匹倦翮方厭飛

流丸注修阪其勢不得休杯水覆坳堂已翻難再收諾
重九鼎輕言契千金投懷哉古俠烈今人非吾儔龍淵

與太阿知我當無郵

范睢甘飼莖張儀承盜璧卷舌就楚鞭拉脅委梁廁驅
車入咸陽立譚枋秦國下令發甲卒六王胥蟠伏當其
與時迂苦爲人蹈藉生不據盛勢安得行胸臆

龍戰噴海水高浪搖蓬萊巨魚緣其隙循勢揚鱗鬣屬
遘王路蹇莫措隆棟欹帝秦恥義士隕周憂緯嫫將欲
攬長策折夔箠羣鷗恢閔富經略幽翳還清夷抗議駭
聾曠世兒皆見疑天門軼蕩蕩陳言終無階

宋徽宗御製白鷹歌和王丈子石作子石爲唐六

公子賦公子言先提督振威將軍

名友耕

購畫於

昭通郭氏價千金

畫鷹之妙如真鷹側搶作勢思騫騰愁胡疾視光炯炯
健格高竦神稜稜細筋屈曲入秋骨生漆點睛突欲出
脫鞬未羨海東青玉翎撲落胡天雪想見陰山九月霜
驚沙刮地搏黃塵殺氣未洩鬱餘怒肅肅陰風生廣堂
道君那惜江山壞熙春閣上摹圖繪一朝媪相覆遼師
日射晚霞金世界徽宗御製詩句金兵入汴人以此爲詩讖女真萬騎來倉
皇踢破鞞尖入汴梁焚盡宣和書畫譜摧殘艮嶽花石
綱六陵風雨愁南渡殘山一角臨安住內庭宸翰落人
間不共金飆捲將去又歷元明幾百年生綃綻裂粉痕

鮮珍同繭紙蘭亭帖不換青苗宋代錢流傳飛渡昆明
海葫蘆小印泥痕在兩行題款瘦金書明珠十斛將軍
買將軍躍馬向沙場手請長纓係僞王髮匪僞翼
王石達開性如
鷲鳥噬搏擊餘孽李永和藍順大狐兔藏卅年世局風塵瀕
鐵甲兵輪驅海湧中原連帥伏雌雞嫖姚永閉祁連塚
龍拏虎攫勢縱橫倦聽封疆鼙鼓聲君不見當時爲少
鷹揚將北狩柴車五國城

新繁東湖懷李堂詹石刻衛公遺像因論吐蕃并
及近事感賦長句

吐蕃寇蜀何披猖西川節度韋南康玉書金印冊南詔

欲斷右臂開河湟任子功名贊皇伯畫地成圖滿四壁
 指揮神筆攬戎機豈獨會昌一品集清溪不渡流潺潺
 兵衝益築邛峽關茂州南路雋州北守捉屯耕烽堠間
 三城雪沒西山戍維州更據山高處降將如招悉怛謀
 漢兵已塞虜來路冬烘頭腦牛奇章惟堪伴食中書堂
 坐捐天險付強敵秋高牧馬窺平涼數百年來迭興替
 六葉一花佛現世宗喀巴創立黃教即有六葉一花之說其弟子班禪達賴迭為活佛各傳
 三世以後不驗人始信其前知震旦初通瞻部洲丹書首貢曼殊帝曼殊
即滿州之音轉達賴班禪護法多熬茶青海水無波金瓶永靖
 烏斯藏乾隆時藏人爭活佛久不能決純廟頒金瓶一令各書名置瓶中拈得者為活佛玉斧

中分大渡河邇來藏衛無安枕英俄睽睽窺邊境霹靂
飛來印度軍劃界碑刊大吉嶺昔時贊普氣縱橫今日
天驕久厭兵喇嘛空爾持黃教蠻觸焉知有戰爭書生
不解籌邊計沈吟往復前朝事恩牛怨李爾何人一卷
平泉花木記知曾載筆向金鑾露點朝衣曉未乾南望
崖州猶有淚我仍八百舊孤寒

論詩三十絕句

王轍旣東詩寂寥漢人樂府楚人騷天留遺種存風雅
莫倚新聲豔六朝

對酒當歌魏武帝沈雄氣韻蓋幽燕君王父子如龍虎

不數陰山勅勒川

公讌鄴臺漳水秋
清華體氣壓應劉
五官能以詩鳴世
何必生兒似仲謀

誤作三河年少看
變風變雅解人難
鍾嶸不讀親親表
豈識哀音合小弁

寄懷沉慟陶元亮
措意深微阮嗣宗
識得鍾王結字法
兩家詩亦是藏鋒

跌宕扶風豪士歌
平原未覺患才多
泥沙不殺朝東勢
焉用阿膠止濁河

同時顏鮑并能文
勝負於今兩未分
華嶽峯尖見秋隼

故應光祿媿參軍

錐幽鑿險思冥冥謝客鐫鑿筆有靈南戒山川出雁宕
昔人屐齒不曾經

子夜前溪盛別裁永明風尚一時開濫觴流出香籟派
豈獨初桃引玉臺

小謝中間又清發唐賢暗裏度金鍼高吟五字澄江練
早已銷亡正始音

不獨瓊華玉樹篇吳音姪麗劇堪憐哀思畢竟能亡國
怪底南朝少百年

陳隋綺靡及初唐合著黃金鑄子昂

元遺山句

萬古江河流

不廢終存盧駱與王楊

遺音三歎拊朱絃
韋孟蕭疏世共傳
才氣無雙射雕手
飛將軍是李東川

七言格調擅歌行
天使高岑負盛名
並馬中原逐老杜
漁陽突騎亦精兵

詩律應同戒律參
右丞體格最矜嚴
少陵修到如來佛
護法終須此善男

天下幾人學杜甫
山谷句桓元子似劉司空
聲鬚面眼俱

相似老婢看來各不同

逸才雋品李青蓮
世外桃源別有天
藥竈殘丹誰舐得

淮王雞犬亦飛僊

詩到貞元才力薄
幾人硬語獨盤空
昌黎特具迴瀾筆
疏鑿龍門識禹功

意雖淺陋語艱深
無限詩中揚子雲
元箸超超長慶集
白描高手畫觀音

誰從豔體別高低
強把金荃配玉谿
沈鬱莽蒼真杜律
西崑何事學無題

橫流滄海到坡仙
衣鉢無人可更傳
除却聰明真佛子
學來終墮野狐禪

勅勒牛羊朔漠風
中州萬古一英雄
淪亡汴宋無窮恨

大定明昌似夢中

樂府明初孰擅場青田突過鐵崖楊若從開國功臣例

一樣中山異姓王

一代文章啓正聲青邱才調本天生玉樓早赴修文詔
微恨波瀾乏老成

名滿中州前七子何郎雋逸有誰如法門一喝當頭棒
不讀唐賢以後書

升庵博雅冠前明六代詞華漢魏聲雖有裁縫鍼綫迹
天孫雲錦已將成

鋪張排比與誰論大厯歌行格尙存欲問津梁尋臥佛

兩尚書後一梅邨

本朝宗派首漁洋北宋南施互短長挂角羚羊三昧集
詩禪只合問滄浪

語不驚人死不休

杜

規韓擬杜笑時流霸才無主何人

似一卷烟霞萬古樓

帝王思想陳同甫兒女情懷杜牧之不道英雄垂暮日

百無成就止傳詩

謂龔定庵亦自慨也

嘉州贈唐子秦

累月京塵緇素衣黃金臺下走征駢正逢滄海羣龍戰
喜見臨邛駟馬歸鈎黨諸賢無郭泰說難終古誤韓非

少年同學應相笑，鍛羽禱褫我不飛。

庚子禊日宴青龍亭，座有金筑袁韻春題壁，舊作
楊佑甫大令次韻爲詩，王君召臣和之余亦勉
成二律，一用元韻，一倒疊元韻。

尖叉險韻鬥吟毫，公讌詩成數二曹。題在上頭難屬和，
節非重九亦登高。永和流水山陰道，吏舍歡呼相國醪。
莫放一春閒過了，清明還待棗爲糕。

饑腸快啗百花糕，涎口渴斟清醪。醪活火山泉烹陸羽，
春盤細膾薦琴高。佛傳半咒馴龍子，官有閒情判馬曹。
我亦靜參莊老意，眼前不敢小秋毫。

重詠史

觚棱金爵隱蓬萊繡服珠襦武帳開華擘未曾簪白奈
瓜詞誰與進黃臺數將列傳尋伊霍多有微辭入定哀
莫上北邙山上望五噫歌罷首重回

五色天書畫采毫歡聲匝地擁黃袍收涼却異唐靈武
持節先徵漢定陶車響曲輪迎邸舍星沈少海不波濤
歸途漫作飛蛾賦象緯橫天夜夜高

電掣溟波鼓鬣帆磨牙猊獠正巉巖縱刑白馬難成約
不棄朱戴肯解嚴玉斧屢聞分大渡金枷仍欲械渾瑊
南天一柱知誰是極目瓊崖涕泗沾

漁唱蘆碕渡楚邱懸金急購伍員頭黃門北寺仇蕃武
宰相南牙軋李牛藩鎮論成言亦罪黨人碑仆姓猶留
劇知朝士傷心處白馬津關莽莽流

却寄

羅巾薌澤久銷沈不記蛾眉淺與深好色可真如宋玉
殺人畢竟誤曾參家書宛轉迴文錦旅橐艱難買笑金
那有錢塘蘇小小西陵松柏結同心

譚濟安廣文歐筱珊孝廉用前韻留別卽以奉贈

玉堂天上信沈沈誤我青袍感慨深後會何年同逝水
今宵醒酒見橫參梅花賦罷腸如鐵薏苡裝成口爍金

任爾呼牛更呼馬莊周應物本無心

威遠遊先覺寺

琳宮隱高樹磴道累層層蹲犬如迎客潛魚不避僧明
碑無片石佛火有然鐙世界一花葉何勞感廢興

題何棠孫師潛穎詩後

屈子沈淵差玉死獨處幽篁冷山鬼大澤荃荀騷怨深
文藻千年照湘水湘水迴旋湘綺樓今之作者王壬秋
斂衽拜手吾無閒生晚不獲從之遊楚材特見異軍起
一官一集隨行李古質璘璠騰泗鼎華言雕縵續文綺
蕭瑟江關庾信哀歌詩樂府平原擬吐納八代成一家

黃金合鑄明七子遺經獨抱鄭公鄉德星况聚高陽里

知是中朝舊世家

先生家自文安公即累葉顯貴

至今喬木無園裏視

學當年徧益梁

東洲老人爲先生大父

學宮懽宴比辛昂梅花句

已吟官閣瓠葉儀仍習禮堂郟酒十筒朝問字冰壺一

片夜焚香諸生白首今猶在尙未全荒陸氏莊天涯宦

蹟留鴻爪先生亦道西川好權關雲擁巫濤秋節樓雪

霽岷山曉每燒官燭治文書閒磨硯研編詩藁論詩我

自媿知音仿佛亦知潛穎心夷光自媒豈國色干將躍

冶非祥金况聞烽火屯畿甸元黃血滲羣龍戰甄宮玉

璽光燭天灞岸金僊淚如霰羽書急遞乾清門飛矢流

入保和殿星球迸烈滄溟翻殘鱗斷甲同焦爛洛陽如
掌古所譏伊川被髮今方見無處桃源可避秦市朝大
隱隱於宦天地長留一卷詩未妨終作處囊錐錦江倦
仕知已久嶽麓歸耕會有期蒼茫獨立高吟處九面衡
山望見之

四先生詩

目營四海竟何之不合時宜一肚皮他日青山歸隱處

會穿生壙傍要離

成都曾竺二齋先生

嫖姚舊將岳襄勤悵望雲臺感昔勳夜獵歸來逢醉尉

灞陵閒殺故將軍

成都岳鳳吾先生

宣室鬼神徵賈誼梁園詞賦老枚乘虛餘吐谷文名在

一卷牀頭温子昇富順宋芸
籽先生

世傳高密鄭公鄉寫訂遺經向禮堂文帝好文臣好武

至今白首尚為郎江蘇寶應劉
佛青先生

渝城贈高虞卿

滿眼山河數行淚平生琴酒幾人墳扁舟此去仍為客
積歲相思始見君欲執干戈衛社稷已聞車駕出河汾
飄零身世無窮恨更為中原感夕曛

有贈

纖纖銀甲細彈箏官燭紅澆淚不成酒醒今宵何處曲

曉風殘月滿江城

髀肉重生莫復朝
婦人醇酒是無聊
銷金帳底英雄淚
化作胥江子午潮

淮南掌記杜司勳
看徧揚州月二分
他日鬢絲禪榻畔
成陰綠葉再逢君

贈楊子端觀察

中興將相出衡湘
鐵券勛名幾姓昌
清德舊傳楊伯起
元功近配左文襄
兒孫列第鳴珂里
富貴還鄉畫錦堂
節鉞相承公繼起
繡衣直指再巡方

馬蹏得意向長安
踏在金鼈背上
看秋月槐街唐舉子

列星薇署漢郎官含香久值尚書省案吏爭傳柱後冠
蜀帥願公爲計相故將鹽鐵論桓寬

然犀燭照最通明利孔如毛徹底清蕭相勳勞惟轉餉
杜陵忠愛望收京永嘉南渡衣冠盡天寶西巡鼙鼓鳴
再造元黃須大力知公有意請長纓

一領青袍誤此身公孫賓閣啓平津品題便已成佳士
禮數常寬勝古人獨媿陳琳狂草檄欣逢丙相醉汚茵
狄門多種閒桃李願熱心香拜後塵

代人壽秦隴督部魏午莊尚書

中台上相應星文抵掌伊吾早策勳保塞今仍天可汗

護羌昔有後將軍金城古柳陽關笛綺閣寒梅隴阪雲
異地祝公千萬壽醪醑未飲意微醺

白龍堆上望祁連曾共嫖姚逐左賢三箭長歌唐壯士
一官久戍漢屯田銀錢安息仍通市金佛休屠敢祭天
蕃部至今懷武略南來牧馬不窺邊

六飛駐蹕向咸陽玉冊金書下帝闈詔督八州加節鉞
印兼四將領河湟無勞二道通西域早築三城備朔方
靈武精兵依舊在公如郭李合興唐

戎幕書勛濫策名衣冠頓改楚人儉燕巢畫棟思前壘
鷗沒江波想宦情成縉幾曾容坐嘯孫陽得遇且長鳴

願公茭舍甘棠蔭遠芘枯花亦向榮

和楊子端觀察感事元韻

一炬阿房火舊京倉皇辭廟劇堪驚苦要謝后簽降表
虛擁中宗兆大橫秦地翦鶉天亦醉楚廷刑馬約難成
莫教再蹈徽欽轍淚灑冰天五國城

歲莫感懷和楊子端觀察韻

忽忽卅年至行行千里餘倦遊仍不遇孤憤爾何如攬
髮愁看鏡藏山且著書終然湖海士豪氣未應除

有贈

垂楊鞭馬過章臺醉數金樓十二釵肉作屏風人似海

看花眼倦爲君開

紅牙低按月黃昏
薌澤微聞酒半溫
絳蠟影牕傳送客
合尊促坐只留髡

芳草天涯易夕曛
鄉心日夜逐歸雲
江關攔下蘭成筆
留寫蛾眉惜誓文

杜鵑勸我不如歸
君爲我歌金縷衣
無那春風管離別
伯勞東去燕西飛

感事十首

病已爲天子甘陵
捕黨魁漢家自有
法越寇已飛來對
泣新亭酒悲歌廣
武臺慈甯宮禁月
回首有餘哀

捲地起胡塵轟天燬火頻開邊緣媼相揖盜豈逋臣陵
闕成焦土衣冠化鬼燐行朝論往事應悔用黃巾
鳥語奈何帝蕃兵曳落河豆田住懷愍麥飯渡滹沱方
鎮勤王少宗藩扈蹕多那堪辭廟日悽絕教坊歌
洛邑遷周鼎咸陽宅漢京詔書深罪已羽檄大徵兵泥
馬無南渡連雞訂北盟微聞增歲幣款議尙無成
發難鼂家令朝衣東市時六州難鑄錯萬死更奚辭此
局成孤注何人受主知中書堂上坐伴食似非宜
相國新揆席尙書舊節旄灰盤畫鐵箸墨勅點銀毫文
吏仍刀筆員機似桔槔治安無上策前席亦徒勞

鄂渚開雄鎮金陵宿重兵
長江守天塹置帥負時名
虜馬飛難渡篝狐夜不鳴
敵情雖狡譎猶自鑒精誠
蕃將哥舒貴牙兵魏博彊
違天作萇叔矯制比陳湯
戰敗連營火歸來半段槍
相期裹馬革何不赴沙場
舉國憂天墜曾知禍始無
同朝六貴偪爭政八王愚黨
錮黃門獄妖言赤伏符醯酸
纔聚蚋莫怨五單于
慘澹元黃血幾微蟣蝨臣
太平十二策君子六千人孰
解謀軍國虛勞問鬼神
只應魯連子不帝虎狼秦

合州釣魚城懷古

君不見南宋都臨安
畫江作塹如彈丸
大江出蜀幾千

里保江先自保蜀始鐵馬秋風和尚原殺金坪上金人
 死後來蒙古起和林關陝長驅寇已深雄都緊縣俱不
 守留下一州大如斗憲宗車駕議親征一角黃旂萬歲
 聲投鞭欲斷合淝水踢鞞已破順昌城王張獨奮空拳
 坐合州自開慶受兵民俗凋敝王堅張珏相繼為守皆能拊輯流散力抗強元能作老羆當
 道臥回回大礮撼軍難百萬元兵不敢過襄陽無那樹
 降旗魯港平章再喪師白雁軍來潮不至崖山風颺送
 殘棊三宮北去不相待碧血山河朝市改孤城與宋為
 存亡靈光一殿巋然在我來艤棹重登臨露蔓烟榛感
 不禁萬畝方田連廢堞一聲寒磬滿空林落花綠繡沈

沙戟春耕時有未銷鐵落日歸鴉無數來荒原片片青
燐屑琳宮梵刹最高層汲水采樵三兩僧帥府旌旗無
故壘佛門香火有然鐙再生發策據形勢難得招賢余
制置余玠爲四川制置使兼知重慶府築招賢館以延奇謀之士得播州人冉璉冉璞兄弟卒用其策徙此山上肯買昭王駿骨灰報爾黃金臺上意今來古
往事茫茫千年浩劫化紅羊夕陽西下何曾住江水東
流空自長成敗有時關氣運英雄無策救危亡臨風默
酌一杯酒憑弔前朝古戰場

和楊子端觀察春暮出游紀興元韻

騎從蕭疏一散官奚囊選句壓吟壇蘭亭集禊杯仍泛

勾漏求仙砂尚丹哀樂中年傷謝傅隱憂王室涕袁安
莫虞覽鏡滋華髮颯爽英姿老據鞍

迴鑾展期八月二十四日恭紀

車駕西巡自去年偶因郊祀駐甘泉黃旗一角風雲擁
紫極雙暉日月懸校獵岐陽周石鼓吹簫汾水漢樓船
莫須感動興元詔社稷天生李晟賢

玉螭金鼇舊帝闈燕郊祇望屬車塵暫留御鳳崆峒蹕
欲夢非熊渭水綸馭騎鞞環帳殿羽林旄罕動鈎陳
秦中父老攀轅切恩詔蠲租免稅頻

太僕天閑控御騶六龍迴鑾待高秋潼關四扇黃河帶

華嶽三峯白帝旒執玉肆朝九州牧貢金會計萬諸侯
茂陵無待陳封禪未必宸心樂豫遊

紫禁丹城夾道懽黃金臺下候迎鑾明堂朝賀仍周禮
司隸威儀尙漢官葱鬱自餘佳氣在艱危方覺中興難
詞臣漫奏平夷頌多恐君王已厭看

秋興四首

客裏登樓感不禁難從沈約賦秋霖雕盤遠塞三邊迴
鳥沒平蕪一片陰豪竹哀絲催短髻夜鐙長簞引歸心
年來大有逃禪意繡佛皈依祇樹林

健筆凌雲志未灰每思削草坐蘭臺江陵十策論兵法

天監三年策秀才無奈文章憎命達幾曾富貴逼人來
而今老却陳留阮書記翩翩絕可哀

學書學劍兩無成擁鼻從容詠洛生沈飲閉關惟頌酒
中年作惡厭聞箏江山搖落驚衰病幕府棲遲負聖明
玉宇高寒重回首長安西向不勝情

羽書金鼓莽如雲衷甲尋盟尙楚氛貨殖輸邊巴寡婦
告身博醉大將軍五遷但有殷盤怨三足終虞漢鼎分
一曲秋風辭唱後幾時簫鼓罷橫汾

壽滇黔督部魏午莊尙書

劍履從容出帝京爭傳節使下昆明玉鈐金策籌邊遠

紫嶽黃靈應數生霖雨早符殷說夢昴星曾降鄼侯精
至今丞相天威在諸葛前身有大名

斗極偏南日在東夜郎久已變華風中書幕府元行省
水戰樓船漢武功天馬八關連緬越酋龍六詔控番蒙
勞臣蓋注綏疆圍宵旰應能慰兩宮

梅花嶺上待春來冠絕羣芳獨早開壯月陽生吹六琯
壽星光滿接三台金沙威極窮邊界鐵柱功高舊相才

騰越有鄂文端鐵柱

甌卜已知名姓在詔書早晚下蓬萊

征西舊部玉門關帥閩賓僚忝侍班凡馬相皮邀一顧
靈鰲抃首戴三山邱遲宦減才俱盡潘岳閒居鬢易斑

欲乞流霞長壽酒略分餘潤駐衰顏

重慶弔明玉珍作

漢公孫晉李特前王後孟紛鼠竊何物英雄明玉珍盜
踞三川成半壁繇來末運多兵爭壠上傭夫盡輟耕兵
強馬大爲天子貶繒屠狗俱成名一隻眼睛石人見賈
魯挑河天下亂旋見晉駝陷荆棘共逐秦鹿分寓縣濠
泗風雲龍在天明祖手提三尺劍鄱陽戰勝圍姑蘇秦
晉略定規燕都幾人稱王幾人帝適與真主爲驅除自
古用蜀宜進取勿徒恃險如守株北開劍閣撼關隴東
下夔門搖荆吳閉關固圍不敢戰焉能一擲梟成盧大

江上游據形勢盍聯北漢依輔車樓船下峽勢破竹氣
吞建業明已無可惜豬奴無遠量井底之蛙非霸王自
守僅如張士誠賊智反輸陳友諒枉將王命論隗囂徒
歎天亡同楚項黃旂紫蓋太匆促寡婦孤兒敢倔強江
山如此送降王蕩蕩漆城寇來上僞朝偏霸幾興亡巴
子臺前江水長讖言不應文佳帝湯沐曾無大澤鄉漢
家大盜銷銅馬隋末羣雄散瓦崗詔置五家人守冢至
今惟有夥頤王

浮圖關

渝州第一重門戶十里郵亭策馬過江水迴旋作濠塹

關牆起伏隱陂陁晨炊舉火耕人少清角吹寒野戍多
且喜時平征戰盡莫虞堠吏厭鈴馱

瀘州遊忠山呂仙祠

早楓殘菊晚秋天地入蠻荒起瘴煙
齧船連檣爭楚岸土官保塞扼滇邊
荒墳白草休談鬼山皆叢葬處旅枕黃梁
願學仙極目故園何處是別來未覺已經年

裊木鎮渡河

亂石寒灘嗚咽流荒蘆敗葦滿汀洲
晚風吹捲花如雪怪得征人盡白頭

內江道中

霜天氣始肅敗葉向人飛
水落蘆碕漲田礲蔗圃肥
前朝石闕在幾輩錦衣歸
邑多前明達官故里鄉人往往建坊駟馬高車過
嗟余始願違

歸途至龍泉驛

一行一驛一疲勞
臨發倣裝雞始號
蠟燭灰餘滴殘淚
亂山歷盡見平皋
厭窺官閣施行馬
夜與達官同寓喧囂徹夜權壓
歸囊有敝貂
妻子相看應怪我
年來容鬢太刁騷

三冬公孫言不老一

印書局印

荃察余齋詩存卷一終

荃察余齋詩存

起癸卯訖丁未

飛蓬集

成都鄧 鎔守瑕

雲陽張桓侯廟

八濛曾拓紀功碑到此重澆酒一卮
白馬怒沈胥母水烏騅氣短憤王祠
心肝披瀝酬先主血肉橫飛撻健兒
風捲靈旂天半舞猶如叱咤暗鳴時

夔府鮑忠壯超故第

蜀將功名配楊岳
霆軍威望亞湘淮
陰符毀版無兵法
公嘗曰我不知兵法但知兵勢耳
俠少椎埋有異才
百戰連營新壁壘

卅年畫錦舊池臺我來欲續平泉記花木彫零盡可哀

白帝城

警蹕旄頭典裔皇三川躍馬獨稱強駉頤府第同陳涉
如掌山河笑洛陽王者之興惟論命國君雖死不迎降
李王明孟俱夷滅不及公孫氣激昂

永安宮

永安宮殿冷靈楸玉座苔衣遺像留一體君臣同骨肉
兩家婚媾變仇讎喜曾受學師盧植恨不生兒似仲謀
霸氣只今消歇盡江山如此不勝愁

峽中雜詩

峽中之石石盤陀峽中之水水漩渦公毋渡河公竟渡
如馬瞿唐奈爾何

螺紋迴旋萬山環江水一流一轉灣割據英雄幾成敗
坐辜天險好江山

拒秦端在結齊婚一賦高唐豈寓言宋玉高唐賦欲楚王聯婚于齊合力

擯秦巫山神女指齊女也孟子緜駒處於高唐左氏齊侯登巫山以望晉師蓋二者皆齊地後人不察以蜀地當之又詭為帝女雲雨荒臺今夢醒更無神女有啼猿瑤姬之說謬矣

內水通航任往還沂江兵舶浪如山而今鎖港無長策
枉指輿圖說扞關

武昌弔陶桓公

西藩關係晉安危羯馬臨江不敢窺軍府事多勞檢攝
郡齋端坐亦威儀船釘留付桓宣武瓦石同舍卜望之
樊口至今餘故壘年年官柳尚垂絲

跣足蓬頭諸少年過江名士幾人傳老爲外吏才難盡

力避朝權晚更賢晉鄙客多能造謗胡三省通鑑注觀
侃在西藩本未豈

有非望折翼之夢皆庾亮之徒傳致之
此如晉鄙之客造謗信陵不足異也蘇卿節在迴堪

憐高勳豈獨當時贊今說桓公尚惘然

朱仙鎮謁岳忠武王廟

三十功名誓滅胡渴思頸血飲匈奴中原失望王師遠
戰地重來舊壘無決獄倘憑金地藏保江誰破鐵浮屠

屬鏤縱扶靈胥眼忍挂東門看沼吳

金牌十二詔班師從此難迎二聖歸寶鼎鑄成龍已去
良弓藏後鳥仍飛殘山一角成南渡大樹千年少北枝
並世張劉稱四將同心只有一韓蘄

湖上銷金尙有鍋不言戰守但言和論都李相難迴蹕
留守宗爺枉渡河浙臉生來成業報秦頭壓處起風波
爹爹富貴猶難比爭把中興望九哥

聞道西湖二月天冶春士女岳墳邊覆巢并惜融兒死
翦髮爭傳侃母賢畢竟河山還我未但看祠廟總巋然
攢宮何處珠邱土幾樹冬青哭杜鵑

大梁懷古

牟駝岡上按方輿數掌螺紋現地圖
良嶽花綱殘石盡淇園竹箭大河淤
止今汝潁無奇士莫恃江淮利轉輸
試數五胡十六國僞都誰向大梁居

青蛾顛頽老如姬零落繁臺秋柳枝
七國連營吳淠壘五家守冢信陵祠
漢明封建無長策枚馬文章盛昔時
我是梁王舊賓客兔園回首益淒其

汴京如釜洛如囊同是中原四戰場
三鎮隔河通魏博十年夾寨鬥梁唐
屠沽任氣稱游俠盜賊逢時作帝王
白馬津邊一惆悵清流濁水恨茫茫

耶律長驅又女真再經蒙古馬蹏塵兵爭累代無王氣
河決頻年有難民大業南游隋士女靖康北狩宋君臣
憲王樂府無遺響夜月金梁水不春

廣州雜感

劉龔墳前飛落花趙佗臺上噪昏鴉畫置郡縣仍秦制
橫海樓船屬漢家幾見閉關乘左纛終看執挺走降車
古今俛仰無窮恨對此茫茫未有涯

明閹持節下西洋番舶東來一葦航蠓鏡何年初互市
虎門從此重籌防人勦臥榻珠厓棄我鑿前車印度亡
不管殘棋劫正急且看天使食神羊

單于冒頓是天驕白雁軍來海不潮莊舄越吟空有淚

蘇卿漢節已無旄金枷械頸纍臣恨絳帕蒙頭道士妖

英人攻廣州垂破故督葉珉琛猶日至觀音山扶乩五十年來成敗事留將閒話

付漁樵

刮盡脂膏海也枯年來合浦漸無珠黑丸頻報誅文吏

赤棒誰能治博徒鈎黨株連比瓜蔓盜魁出沒在萑苻

莫須鬻食憂羣虎厝火然薪已可虞

羊城客感

遙睇中原入窅冥萬尖那見蜀山青馬頭日落營門暗

鼉背風來海水腥嵐嶺瘴迷三里霧歌船燈散一江星

倦遊也覺歸休好無柰征蓬未肯停

萬里江湖七尺身勞勞馬背與船唇
長年作客同齊贅
半夜聞歌盡楚人
姑典敝裘仍買醉
待磨寶劍已生塵
那堪腰鼓催殘臘
又見炎荒海國春

憑高獨上越王臺
異地風光暫遣懷
鮫女織綃隨市賣
蜃人操艇候潮來
六街博局輸王稅
一卷方言礙辯才
喜有四時花不斷
南枝先發嶺頭梅

茶煙禪榻鬢絲絲
老却清狂杜牧之
朝莫謹調狙喜怒
迷離不辨兔雄雌
愁邊感遇詩能遣
夢裏還家路太歧
忽向蘇門發長嘯
胸中傀儡有誰知

廣州贈妓

重樓深邃阿嬌藏
銀字調箏心字香
一笑拏幃花解語
不須重譯訪珠孃

烏雲高簇玉鴉叉
登頰紅潮暈晚霞
爲誦凌波羅襪賦
玉兒何用步蓮花

淡淡胭脂點絳脣
瓊枝色澤玉精神
垂璫四角流蘇帳
明月偷來鑿壁人

纔唱扶風豪士歌
愛河一墮又生波
爲君消滅風雲氣
不復登臺弔尉佗

晚至京口

陰雲低壓潤州城
星火金焦兩點明
上下寒潮終夜打
古今天塹一江橫
英雄劉裕南朝帝
部曲桓溫北府兵
天下江山此第一
愁看瓜步佛狸營

九江弔周公瑾

三國英雄兩少年
孫郎而外此翩翩
貌如冠玉陳平美
貧感分金鮑叔賢
大婦兵書同布陣
後堂女樂待調絃
浪淘人物風流盡
今過柴桑輒惘然

不讓荊州踞上游
龍拏虎攫死方休
成神蔣帝無青骨
短命桓王並黑頭
後起功名歸陸呂
姻家仇怨誤孫劉
幾封降表中原去
那要生兒似仲謀

鄱陽湖觀陳友諒戰處

元黃龍戰駭當塗曾此江神鬥舳艫捲土重來真大舉
殘棋打劫竟全輸河山一擲拚孤注劍璽千年葬僞都
我向蛇山酌杯酒孝陵麥飯近何如

沔陽雲氣起重瞳羣盜如毛敢比公江表古今多割據
史家成敗論英雄興王將相雖天授僭國君臣有霸功
度牒袈衣皇覺寺緇徒何必定真龍

乙巳二月初十生日感賦

一彈指頃一華嚴三十之年已過三河不奈何公竟渡
樹猶如此我何堪上牀有夢難伸脚對鏡無言但責髯

聽喚哥哥行不得江湖滿地待收帆

水自東流日向西集枯集菀豈能齊到中年後傷哀樂
難做人時敢笑唬因果分明花墮溷死生流轉絮黏泥
惟嫌混沌先開竅心有通靈一點犀

雞犬淮南早上天蠹魚食字不成仙俳優畜我能詞賦
酒食論交得醉眠春夢一場婆子唱秋波四壁美人禪
白楊徧種齋前樹何必人生要百年

鼻端火出耳風生碁局中心最不平愁有信來潮子午
事難前定博輸贏邠卿自恨無時命康伯何能變姓名
去日苦多來日少黃河俟到幾時清

吳縣潘相國故第

瀛州學士玉堂僊伴食中書二十年官樣文章難入古
清時將相例無傳人稱常袞辭堂饌帝召桓榮侍講筵
墓碣可書惟一事遺言曾薦侯官賢

遺摺薦林文忠公事

古決絕詞

天涯厭倦看花眼黃金爛熳愁中遣舊事成塵綺夢消
流年似水風情減那復迴文錦字來謝他歌舞趙陽臺
求漿偶贈雲英杵占夢難諧小玉鞋琵琶亭畔初相見
煙水湖邊夜張讌明月三分杜牧狂春風一曲司空慣
別有香巢不肯留潯江楓荻四絃秋畫圖略省真真面

塵跡常封盼盼樓，塞鴻難覓無雙處。去去煙波楚天暮，
潞浦落霞孤鶩飛。漢口夕陽一鳥度，不唱憐儂唱惱公。
漢皋解佩又重逢，低鬟微笑愁如故。嚮壁無言語，未通
妝樓梳洗開鸞鏡。璧人接坐雙肩並，新月初絃乍刺眉。
濃雲高簇輕攏鬢，花樣容顏玉樣肌。娉婷顧影自憐時，
么絃譜出無愁曲。團扇吟成薄命詩，門前履跡綠苔繡。
繫與香囊致扣扣，遲我初三下九時。暗記相思數紅豆，
自言錦瑟怨遙年。豔說文簫娶彩鸞，不須金谷量珠價。
信有藍田種玉緣，樂府待歌中婦豔。迴黃轉綠君心變，
御溝春水各西東。惱殺釵頭雙白燕，薄倖青樓舊有名。

十斛明珠我負卿
盒中宛轉同心結
枕上悽涼鬢臂盟
迎來桃葉知無分
月圓花好人長恨
玉簫再世侍韋皋
今生莫署鴛鴦券
冶葉倡條幾度春
豈應玉貌老風塵
嫁將如海侯門去
讓我蕭郎作路人

蘇州留園

山塘七里照瓊花
別有留園勝館娃
香徑不塵珠屐鳳
春烟欲罩翠鬟鴉
頰潮雙暈偷窺鏡
眉語千回近隔紗
莫忘朱樓臨水蓋
金閨門裏是兒家

濠園

吾鄉李眉生方伯
流寓蘇臺購瞿氏
網師園葺

而居之更名蘧園最稱精雅方伯孫友鵬大令

招飲園中歸而賦此

富貴何曾衣錦還空餘花木記平泉買鄰近接鄉前輩

園與蘇子美
滄浪亭相近結構真同小有天老嫗氈椎殘祖石方伯

多藏書畫碑板彝器雇蘭陵高姓節婦在內室司椎拓
見方伯與俞黓司寇書語聞所收藏今已散佚垂盡矣

先人邱壘隔瀧阡吾鄉李申甫先生遺集頗
以方伯不正首邱為責宦成我道

歸山好陽羨無須更買田

日京別王仰思

棘地荆天掉臂游罡風吹墮海東頭龍蛇起陸人猶蟄

花木逢春我自秋莽莽潮音迴大陸沈沈暝色壓危樓

與君別有傷心事時上高層望薊邱

別君漢上太匆匆君自西歸我向東
酒染杭襟如昨日
篋捐齊素又秋風健兒刀稍頭鬚白
女子瓊瑰眼淚紅
不北走胡南走越側身天地幾相逢

荃察余齋詩存卷二終

